

UKA 2001/27

**Suliffissaaleqisunik sulilersitsiniarneq pillugu Inatsisartut peqqussutissaattut
siunnersuut**

pillugu

Inatsisartut Isumaginninnermut Suliffeqarnermullu Ataatsimiititaliaata

ISUMALIUTISSIISSUTAA

siunnersuutip aappassaaneerneqarnerani saqqummiunneqartoq

Inatsisartut Isumaginninnermut Suliffeqarnermullu Ataatsimiititaliaat
suliarinninnermini ukuninnga inuttaqarpoq:

Inatsisartuni ilaasortaq Asii Chemnitz Narup, Inuit Ataqtigiit, siulittaasoq
Inatsisartuni ilaasortaq Ruth Heilmann, Siumut, siulittaasup tullia
Inatsisartuni ilaasortaq Mikael Petersen, Siumut
Inatsisartuni ilaasortaq Jakob Sivertsen, Atassut
Inatsisartuni ilaasortaq Loritha Henriksen, Kattusseqatigiit

Inatsisartut Isumaginninnermut Suliffeqarnermullu ataatsimiititaliaata UKA 2001-
imi siullermeerinerup kingorna suliffissaaleqisunik sulilersitsiniarneq pillugu
Inatsisartut peqqussutissaattut siunnersuut nassuiaatitai ilanngullugit misissorpaa.

Tusarniaanermi akissutisiat

Ataatsimiititaliaq suliffissaaleqisunik sulilersitsiniarneq pillugu peqqussutissatut siunnersuutip ataatsimiititaliamit suliarineqarnerani atugassanik tusarniaanermi akissutisianik aammalu tusarniaaneq pillugu allakkiamik piniarsimavoq.

Ataatsimiititaliap paasivaa tusarniaanermi sivikinnerpaamik piffissaliunneqartussatut piumasagaat naapertorlugu suliffissaaleqisunik sulilersitsiniarneq pillugu peqqussutissatut siunnersuut sapaatip akunnerinik sisamanik piffissaliilluni tusarniaassutigineqarsimasoq aammalu attuumassuteqartut tamarmik tusarniaaffigineqarsimasut.

Siunnersuutip imarisai

Piginnaangorsaaqqinnissamut ikiorsiisarneq pillugu peqqussummik Inatsisartut UPA 2001-imi akuersissutiginninnerat tunngavigalugu siunnersuut saqqummiunneqarpoq. Tamatuma kingunerisaanik akissarsianut tapiissuteqartarneq allamillu ilinniagaqaqqinneq pillugit aalajangersakkat maanna atuuttut suliffissaaleqisunik sulilersitsiniarneq pillugu peqqussummit peerneqassapput, tassa akissarsianut tapiissuteqartarnermut allamillu ilinniagaqaqqinnermut malittarisassat piginnaangorsaaqqinnissamut ikiorsiisarneq pillugu Inatsisartut peqqussutaanni aalajangersarneqarmata. Kommuniq suliffissaqartitsiniutaani suliffissaaleqisup sulisinnaanera suli periarfissaassaaq, tassanimi sulisoq imaaliallaanaq sulilersinneqarsinnaammat. Taakkununga ikiorsiisarneq suliffissaaleqisunik sulilersitsiniarneq pillugu Inatsisartut peqqussutaat naapertorlugu suli ingerlanneqartassaaq.

Isumaginnittoqarfiup aqunneqarnera aaqqissuussaaneralu pillugit Inatsisartut peqqussutaanni aalajangersakkat malillugit naammagittaalliornissamut innersuussut maanna atuuttoq peerneqarpoq, Inatsisartummi peqqussutaat isumaginninnerup iluani malittarisassanut ilaangimmat, taamaattumillu naammagittaalliorsinnaanermut pineqartumut ilaatinneqarani. Suliffissaaleqisunik sulilersitsiniarneq suliffeqarnermi suliniutaavoq naammagittaalliorsinnaanermut malittarisassanik immikkut aalajangersaavigineqarsimanngitsoq. Inatsisartulli Isumaginninnermut Suliffeqarnermullu Ataatsimiititaliaat naliliivoq innuttaasut suliffissaaleqisunik sulilersitsiniarneq pillugu Inatsisartut peqqussutaat malillugu ikiorserneqartartut Inatsisartut Ombudsmandiannut nalinginnaasumik naammagittaalliuuteqarsinnaanermikkut inatsisitigut illersugaanerat qulak-keerneqartoq.

Tamatuma saniatigut siunnersuummi oqaasertatigut naqqiissuteqartoqarpoq aammalu allaffissornikkut oqilisaassiumalluni suliffissaaleqisunik sulilersitsiniarneq pillugu peqqussutip maanna atuuttup 1994-imeersup allannguutissaanik saqqummiussinissamut taarsiullugu peqqussutissatut nutaatut siunnersuummik saqqummiussisoqarluni.

Isumaginninnermut Suliffeqarnermullu Ataatsimiititaliap isumaqatigiittup inassutigaa suliffissaaleqisunik sulilersitsiniarneq pillugu Inatsisartut

peqqussutissaattut siunnersuut saqqummiunneqarnermisut iluseqartillugu akuersissutigineqassasoq.

Taama oqaaseqarluni Inatsisartut Isumaginninnermut Suliffeqarnermullu Ataatsimiititaliaata suliffissaaleqisunik sulilersitsiniarneq pillugu Inatsisartut peqqussutissaattut siunnersuut aappassaaniigassanngortippaa.

Asii Chemnitz Narup
Siulittaasoq

Ruth Heilmann

Mikael Petersen

Jakob Sivertsen

Loritha Henriksen